



Publicaziuns dalla vischnaunca, jamna 13

Cussegl da vischnaunca

Rapport dalla seduta dils 23-3-2018

En sia seduta dils 23 da mars 2018 ha il cussegl da vischnaunca sut il tgamun d'Armin Manetsch tractau il remplazzament parzial dalla canalisaziun a Mumpé Medel. Il project preveda da remplazzar la canalisaziun d'aua tschuffa leu nua che quella vegn tangada entras las lavurs vid il conduct dil provediment d'aua resp. entras la via. Ulteriuramein duei l'aua da plievgia e dils begls vegnir menada separadamein ella canalisaziun d'aua schubra. Per quei intent eis ei necessari da construir ina canalisaziun nova a Crusch. Igl ei buca previu da separar tut las auas da plievgia e drenadi a Mumpé Medel. Quels cuosts stessen en negina relaziun cul nez, denton ei previu da colligiar ils begls, ina part dil drenadi dalla via communal el vitg da Mumpé Medel sco era l'aua dalla deflussiun dalla via cantunala. Il cussegl da vischnaunca ha approbau unanimamein il project e concediu persuerter in credit net da frs. 410000.–. La damonda da credit vegn suttamesa el senn digl art. 21 lit. c dalla constituiun communal al referendum facultativ. Plinavon ha il cussegl eligiu unanimamein Pauli Lozza sco niev commember ella cumissiun preparatoria per la revisiun parziala dalla planisaziun locala. El remplazza Aluis Huonder ch'ei seretratsg dalla cumissiun.

Suprastonza communal

Referendum facultativ

A caschun da sia seduta dils 23 da mars 2018 ha il cussegl da vischnaunca approbau unanimamein in credit net da frs. 410 000.– pil project da remplazzar parzialmein la canalisaziun existenta e da separar las auas piarsas a Mumpé Medel.

Conform ad art. 21, lit. c dalla constituiun communal ei quella decisiun suttamesa al referendum facultativ. Il messadi tier sura fatschenta ei exponius per envesta en casa communal (stanza nr. 10).

Enteifer 20 dis dapi la publicaziun ufficala han 80 votants la pusseivladad d'inoltrar enviars sura conclus il referendum e pretender ina votaziun dil pievel.

Suprastonza communal

Referendum facultativ spirau

Ils 23 da fevrer 2018 ha il cussegl da vischnaunca approbau unanimamein la lescha davart l'indemnisaziun dallas prestaziuns dalla vischnaunca Disentis/Mustér en connex cul provediment d'electricitad.

Encunter quella decisiun ei enteifer il termin fixau buca vegniu fatg diever dil referendum, aschia che la revisiun parziala dalla lescha passa en vigur retroactivamein cun igl 1. da schaner 2016.

Suprastonza communal

Administraziun communal

Sur Pastgas

Venderdis, ils 30 da mars 2018 entochen mardis, ils 3 d'avrel 2018, allas 9.00 resta l'administraziun communal serrada.

Bien engraziament per Vossa capientscha.

Administraziun communal



«SRF bi de Lüt – Heimweh»

Encuretg persunas

La Televisiun svizra SRF enquera per sia nova documentaziun «Heimweh» persunas che retuornan dil lontan ni eifer la Svizra anavos en lur patria nativa. Encuretg vegnan persunas che fan quei pass ils proxims meins q.v.d ils meins avrel entochen uost 2018.

SRF documentescha la veta dalla persuna che retuorna, e quei naven dalla partenza entochen tier l'arrivada en siu liug d'origin. Cun la documentaziun duei vegnir eruii, schebein l'encarschadetgna ha saviu vegnir cuschentada.

Enconuscheis Vus talas persunas ni sesanfleis Vus en quella situaziun?

Lu s'annunziei tier SRF sut www.srf.ch/srfbideluuet ni directamein tiel producent dall'emissiun Rolf Elsener:

rolf.elsener@srf.ch ni tel. 044 305 59 22.

Bien engraziament per Vos impuls e Vies interess.

Administraziun communal

Fiasta naziunala 2018

Preavis

La festividat dalla Fiasta naziunala digl'emprems d'ost 2018 ei preveda da menar atras **gievgia, ils 2 d'ost 2018**. Nossa vischnaunca separticipescha questa stad all'emissiun «DonnschtigJass». Il turnier da qualificaziun ha liug ils 9 d'avrel 2018 el Center da sport e cultura, Disentis/Mustér. L'emissiun «DonnschtigJass» culs giugadurs da Disentis/Mustér e Savognin vegn transmesa ils 26 da fenadur 2018 dad Elgg ni Oberrieden. Sch'ei reussescha als giugadurs da nossa vischnaunca da batter ils jassists da Savognin, vegn l'emissiun dils 2 d'ost 2018 emessa da nies vitg claustral. Ord quei motiv e per nezegiar sinergias, ha la fiasta naziunala lig uonn pér ils 2 d'ost.

Ulteriuras informaziuns suondan.

Administraziun communal

Serrada dalla via Cavardiras

Tschancun dutg da Caprau entochen sbuccada dalla via Caprau

Igl'uffeci cantunal da construcziun bassa dil Grischun preveda ina sanaziun generala dalla via da comunicaziun a Cavardiras.

Duront las lavurs da construcziun sto la via vegnir serrada per scadin traffic sil tschancun naven dil dutg da Caprau entochen tier la via a Caprau.

Las lavurs da construcziun entscheivan suenter Pastgas e cuozan entochen la fin d'ost 2018. In urari detagliu dalla serrada suonda.

In'untgida ei pusseivla sur la via da comunicaziun Pardomat–Cavardiras per vehichels entochen 11 t.

Per pedunzs e velocipedists ei il passadi adina pusseivels. Per ulteriur sclariment san ins sevolver tiel responsabel digl'uffeci da construcziun bassa dil cantun, Pius Cavegn, telefonin 079 334 74 14 ni tiel menader digl'uffeci da baghegiar, Ervin Maissen, tel. 081 920 36 46.

Bien engraziament per Vossa capientscha.

Disentis/Mustér, ils 20 da mars 2018

Uffeci da construcziun bassa dil Grischun, district 6

Pius Cavegn

Uffeci da baghegiar dalla vischnaunca da Mustér

Ervin Maissen



Serrada dalla via Mumpé Medel

Tschancun caplutta da sogn Valentin entochen alla fin dil vitg

Igl uffeci cantunal da construcziun bassa dil Grischun preveda ina sanaziun generala dalla via da communicaziun tras il vitg da Mumpé Medel.

Duront las lavurs da construcziun sto la via vegnir serrada per scadin traffic sil tschancun, naven dalla caplutta da sogn Valentin entochen alla fin dil vitg.

Las lavurs da construcziun entscheivan ils 10 d'avrel e cuozan entochen ils 8 da zercladur 2018. In urari detagliu dalla serrada suonda.

(Ils firaus, las sondas e dumengias ei la via aviarta.)

Ei dat negina pusseivladad d'untgida. Ella vischninonza dalla caplutta vegn dau caschun da parcar vehichels. Per pedunzs e velocipedists ei il passadi adina pusseivels.

Per ulteriur sclariment san ins sevolver tiel responsabel digl uffeci da construcziun bassa dil cantun, Pius Cavegn, telefonin 079 334 74 14 ni tiel menader d'infrastructura, Ervin Maissen, telefon 081 920 36 46.

Bien engraziament per Vossa capientscha.

Uffeci da construcziun bassa dil Grischun, district 6,

Pius Cavegn

*Uffeci da baghegiar e d'infrastructura
dalla vischnaunca da Mustér*

Lenna da brisch

Damondas per lenna da brisch (**pégn ni fau**) ein da far **en scret entochen ils 20 d' avrel 2018** agl uffeci forestal dalla vischnaunca da Mustér, Simon Cathomen, caum postal 57, 7180 Disentis/Mustér ni per email; uaul@disentis.ch. Per plascher indicar il sortiment giavischau (lenna sort ni lenna fendida) ed il quantum. Sin giavisch vegn la lenna era furnida franco a casa.

Uffeci forestal Disentis/Mustér

Rimnada da pupi

Venderdis, ils 20-4-2018

Adatg! Ei vegn mo rimnau: gasettas, illustradas, catalogs, cudischs e prospects stampai.

Il pupi sto vegnir deponius sper via (sche pusseivel in di avon). Igl ei impurtont da ligiar bein il pupi e da buca far memia gronds pacs. Engraziell.

Nus rimnein buca cartun. Quel sa vegnir deponius a Raveras igl entir onn ora, e quei las mesjamnas (16.00–17.30) e sondas (10.00–12.00) e buca duront la rimnada.

Bien engraziament per Vies agid e sustegn!

Scolas Mustér, Ch. Berger

Cinema Salaplauna per affons

Stallkino für Kinder: «Paddington 2» (UK 2017)

Mittwoch, 4. April, Center sursilvan d'agricultura, Disentis/Mustér. Film: «Paddington 2» – die Fortsetzung des berühmten PaddingtonFilms. Den PaddingtonBär kennt wohl jeder. Ein knuffiger, lustiger Zeitgenosse aus Peru, der in London ein neues Leben anfängt und mit der Familie Brown beste Freunde findet. Paddington sorgt wieder für viel Wirbel und erobert erneut die Herzen von Gross und Klein im Sturm! Wir zeigen ihn für die Kinder in der deutschen Version. Türöffnung 15.30 Uhr, Filmstart 16 Uhr, Eintritt frei, Kollekte.



Uniun samaritana Disentis/Mustér

Cuors BLS-AED-SRC Komplett

L'uniun samaritana Mustér organisescha il cuors da reanimaziun BLSAEDSRC Komplett.
(Reanimaziun cun applicaziun dil defibrilatur automatic)

Datum: Sonda, ils 14 d'avrel 2018

Uras: 8.00–12.00

Liug: Casa da scola Mustér

Annunzias: Ein da far entochen ils 10 d'avrel 2018 tier: Martina Giger, tel. 079 299 36 13
email: martina.casanova@gmx.ch

Preavis/Referat public

Murdidas da zeccas e las consequenzas

ils 23 d'avrel 2018, allas 20.00 en halla Cons a Mustér Referent: Dr. Tarcisi Maissen
